

**Ni Presidente
Dieter F. Uchtdorf**
Maikadua a Mammagbaga
iti Umuna a Panguluén



Pannagna nga Agpalawlaw

Nangngeganyo kadin ti daan a pagsasao nga agbanag dagiti mapukaw a tattao iti pannagna nga agpalawlaw?

Tinarigagayan ni Jan L. Souman, maysa a German psychologist, ti mangammo babaen iti siensia no pudno daytoy. Nangala kadagiti tao a makiraman iti maysa nga eksperimento iti maysa a dakkel a lugar ti kabakiran ken iti disierto ti Sahara ket nangusar iti global positioning system a pantunton no sadino ti papananda. Awan ti kompas wenno ania man a sabali pay a maaramat. Simple laeng dagiti pangiturong a naited kadakuada: magna iti nalinteg a dalan iti direksion a naipakita.

Idi agangay inlawlawag ni Dr. Souman no ania ti napa-samak. “[Sumagmamano] kadakuada ti nagna iti naulep nga aldaw, a nakalinged ti init kadagiti ulep [ken awanan pangitudo kadagiti turongen a makita]. . . . [Nagnada] amin nga agpalawlaw, a [sumagmamano] kadakuada ti mangdagdagullit a mangballasiw iti bukodda a dalan a dida madlaw daytoy.” Nagna met dagiti sabali pay a tattao a nakiraman kabayatan ti panaglawag ti init, nga adda dagiti makita a pangitudo kadagiti turongen. “Dagitoy . . . sinurotda ti dumani naan-anay ti kinalintegna a dalan.”¹

Daytoy a panangadal ket inulit dagiti dadduma pay nga agsukisok iti sabasabali a wagas.² Napadasan ti amin dagiti isu met la a resulta.

No awan dagiti makita a tanda, agbanag a dagiti tao iti pannagna nga agpalawlaw.

Dagiti Tanda ti Nasantuan a Kasuratan

No awan dagiti naespirituan a tanda, mayaw-awan met dagiti tao. No awan ti balikas ti Dios, saantayo a dumur-as iti kinaespirituan.

Agpada a kas tao ken kas kagimongan, makitatayo daytoy a pagtuladan a nadagdagullit iti tunggal dispensasion manipud pay iti rugi ti panawen. No mapukaw ti imatangtayo iti balikas ti Dios, agbanagtayo iti pannakayaw-awan.

Awan duadua a daytoy ti gapu ti nangbilinan ti Apo ken ni Lehi a mangibaon kadagiti annakna a lallaki nga agsublida iti Jerusalem a mangala kadagiti pinanid a gambang. Ammo ti Dios a kasapulan dagiti an-annabo ni Lehi dagiti mapagpanurayan a tanda—dagiti pangitudo a pagibasaran—a mangipaay kadakuada iti pangiwawanwan a mabalinda nga usaren tapno mangammo no addada iti umno a dalan.

Dagiti nasantuan a kasuratan ti balikas ti Dios. Isuda dagiti tanda ti Dios a mangiparang iti dalan a nasken a pagdaliasantayo tapno iti kasta agbalintayo nga as-asideg iti Mangisalakantayo ket maragpattayo dagiti maikari a panggep a tun-oyen.

Ti Tanda ti Sapasap a Komperensia

Dagiti pangiturong a naited iti sapasap a komperensia ket sabali pay a tanda a makatulong kadatayo a mangammo no addatayo iti umno a dalan.

Sagpaminsan a saludsodek iti bagik, “Dimngegak kadi kadagiti balikas nga inted dagiti lallaki ken babbai a nagsarita itay kallabes unay a sapasap a komperensia ti Simbaan? Binasak ken inulitko kadin a binasa dagiti balikasda? Inutobko kadi dagitoy ken inaramatko kadi dagitoy iti biagko? Wenno naliwliwaak kadi laeng kadagiti napipintas a bitla ket naliwayak ti mangipakat kadagiti makaparegta a mensaheda iti bukodko a biag?”

Nalabit a kabayatan ti panagdengngeg wenno panagbasayo, nagisurat kayo iti maysa wenno dua man. Nalabit a nagkumit kayo nga agaramid iti sumagma-mano a nasaysayaat a banag wenno naidumduma. Panunotenyong laeng maipapan kadagiti mensahe ti kaudian a sapasap a komperensia. Adu kadagiti mensahe ti nangallukoy kadatayo a mangpapigsa kadagiti pamiliatayo ken mangpasayaat iti pannakilangentayo kas agassawa. Daytoy nga isyu ti *Liahona* ket ipokusna pay ti maipapan kadagitoy nga agnanayon nga ik-ikkan pateg, a naglaon iti adu a maipakat wenno maaramat a singasing a mangbendision kadagiti biagitayo.

Siaannad kadi a tungtungpalen ken ar-aramatentayo daytoy napateg a balakad? Laslasinen ken magmag-natayo kadi nga agturong kadagitoy napaypayso ken napapateg a tanda?

Ti Agas ti (Naespirituan) a Pannakayaw-awan

Dagiti naespirituan a tanda ket kasapulan unay iti panamagtalinaedatayo iti nalinteg ken akikid a dalan. Dagitoy ti mangted iti nalawag a direksion maipanggep iti dalan a nasken a daliasatentayo—ngem maaramid laeng no lasinentayo dagitoy ken magnatayo nga agturong kadagitoy.

No agkedkedtayo a paiwanwan kadagitoy a tanda, agbalinda nga awan kaipapananda, makaay-ayo a bambanag nga awan panggepna no di ketdi mangdadael iti panagkaykaysa ti biag.

Saan nga umdas a paiwanwantayo laeng kadagiti pagduyosantayo.

Saan nga umdas a maaddaantayo kadagiti kasayaatan a panggep.

Saan nga umdas nga agpannuraytayo laeng kadagiti gagangay a panagriknatayo.

Uray no ipagaruptayo a sursurotentayo ti nalinteg a naespirituan a dalan, no awan dagiti pudno a tanda a mangiwanwan kadatayo—no awan ti pannarabay ti Espiritu—agbanag nga agalla-allatayo.

Ngarud, luktantayo koma dagiti matatayo ket kumita kadagiti tanda nga impaay ti manangngaasi a Diostayo kadagiti annakna. Basaen, denggen ken aramatentayo koma ti balikas ti Dios. Agkararagtayo koma nga addaan pudno a panggep ket dumngeg ken surotentayo dagiti parikna ti Espiritu. Apaman a nailasintayo dagiti nailangitan a tanda nga inted ti managayat a Nailangitan nga Amatayo, nasken nga agbiagtayo a mayannurot kadagitoy. Nasken pay nga aturentayo ti biag ken ugalitayo kabayatan ti panangiturongtayo iti bagbagitayo kadagiti naespirituan a tanda.

Iti kastoy, saantayto nga agallaalla a manglawlaw ngem ketdi magnatayto nga addaan panagtalek ken awanan duadua nga agturong iti nailangitan a parabur nga isu ti kinainauna [birthright] ti amin a magna iti nalinteg ken akikid a dalan ti kinadisipulo ni Cristo.

DAGITI NAGADAWAN

1. Kitaen iti Jan L. Souman and others, “Walking Straight into Circles,” *Current Biology* vol. 19 (Sept. 29, 2009), 1538.
2. Kitaen, kas pagarigan ti, Robert Krulwich, “A Mystery: Why Can’t We Walk Straight?” npr.org/blogs/krulwich/2011/06/01/131050832/a-mystery-why-can-t-we-walk-straight.

PANANGISURO MANIPUD ITI DAYTOY A MENSAHE

Bayat ti panangisaganayo a mangisuro manipud iti daytoy a mensahe, mabalinyo ti agsukisok kadagiti nasantuan a kasuratan kadagiti pagarigan dagiti tao nga inturong dagiti naespirituan a tanda wenno tattao a nagallaalla nga agpalawlaw. Mabalinyo a rugian ti panagadalyo kadagitoy a nasantuan a kasuratan: Numero 14:26–33; 1 Nephi 16:28–29; Alma 37:38–47. No mariknayo a maguyugoykayo, mabalinyo nga ibinglay dagiti nalawag a pannakaawat ken pannakaammo manipud kadagitoy a pagarigan kadagiti sursuruanyo. Saludso-denyo ida no ania ti masursurotayo manipud kadagitoy nga estoria.

AGTUTUBO

Dagiti Tanda para Kadakayo

Iladawan ni Presidente Uchtdorf ti sapasap a komperensia ken dagiti nasantuan a kasuratan kas tanda a makatulong kadatayo a mangliklik iti naespirituan

a panagallaalla. Utobenyo dagiti sabali pay a tanda a nakaimpluensia ken nakaiwanwan iti biagyo. Isuratyo dagiti padasyo iti diurnalyo. Mabalín a makatulong kadakayo dagitoy nga adaw manipud ken ni Presidente Thomas S. Monson:

Ti bendisionmo iti patriarka ti mangtulongto kenka kadagiti karigatan a pannubokmo. Daytoy ti mangtarabayto kenka kadagiti pagpeggadan ti biag. . . . Nasken a saan a makulpi ken maidulin ti bendisionmo. Nasken a saan a maikuadro wenno maipablaak daytoy. Ngem ketdi, nasken a basaen daytoy. Nasken nga ipateg daytoy. Nasken a surotén daytoy.”

“Your Patriarchal Blessing: A Liahona of Light,” *Ensign*, Nob. 1986, 66.

“Saannatayo nga imbaon ti Nailangitan nga Amatayo tapno dumur-astayo nga agnanayon nga awan ti impaayna a wagas a pakaawatantayo Kenkuana ti pannarabay tapno manamnama ti natalged a panag-sublitayo. Saritaek maipapan iti kararag. Saritaek pay

maipapan kadagiti arasaas manipud iti dayta naulimek, bassit a timek.”

“The Race of Life,” *Liahona*, Mayo 2012, 92.

ANNAK

Masarakak ti Dalanko

Kuna ni Presidente Uchtdorf a masapul a surotentayo dagiti naespirituan a tanda gapu ta dagitoy ti mangtulongto kadatayo a pumili iti umno ken ad-adda nga umasideg iti Mangisalakan. Ti kararag, dagiti nasantuan a kasuratan, sapsap a komperensia, ken ti *Liahona* ti sumagmamano kadagitoy a tanda.

Kaduayo ti pamiliayo, basaenyo ti maysa a bitla manipud iti kaudian a sapsap a komperensia. Ania ti isingasing ti nagbitla nga aramidentayo tapno agtali-naedtayo iti umno a dalan? Mangitudingkayo kadagiti panggep a tun-oyen a kaduayo ti pamiliayo a mangaramat iti no ania ti nasursuroyon.



Pammati, Pamilia, Tulong

Rag-o iti Pakasaritaan ti Pamilia

Sikakararag nga adalenyo daytoy a material ken, no maitutop, ilawlawagyo daytoy kadagiti kakabsat a babbai a sarungkaranyo. Usarenyo dagiti saludsod a mangtulong kadakayo a mangpapigsa kadagiti kakabsatyo a babbai ken mangaramid iti Relief Society nga aktibo a paset ti bukodyo a biag. Para iti ad-adu pay nga impormasion, mapan iti reliefsociety.lds.org.

Insuro ni Elder Russell M. Nelson ti Korum dagiti Sangapulo-ket-dua nga Apostol a ti Espiritu ni Elias ket “maysa a panangiparangarang ti Espiritu Santo a mangipampanek-nek maipapan iti nadosan a kasa-saad ti pamilia.”¹

Kas miembro ti naisubli a Simbaan ni Cristo, addaantayo iti naitulag a pagrebbengan a mangsukisok kadagiti kapuonantayo ken mangipaay para kadakuada kadagiti pangisalakakan nga ordinansa ti ebanghelio. Isuda no awantayo saanda a “makapagbalin a naan-anay” (Hebreo 11:40), ken “saantayo a makapagbalin a naan-anay no awan dagiti minataytayo” (DkK 128:15).

Ti aramid iti pakasaritaan ti pamilia [family history] ket mangisagana kadatayo para kadagiti bendision ti agnanayon a biag ken makatulong kadatayo a mangpapigsa iti pammatitayo ken bukod a kinalinteg. Ti family history ket napateg unay a paset ti mision ti Simbaan ken mangpabalina iti aramid ti pannaka-isalakan ken pannakaitan-ok para iti amin.

Kinuna ni Presidente Boyd K. Packer, Presidente ti Korum dagiti Sangapulo-ket-dua nga Apostol: “No suksokentayo dagiti bukodtayo a kapupuon iti pamilia ad-adda pay nga agessemantayo a

mangaramid iti ad-adu pay ngem kadagiti nagan laeng. . . . Ti panagessemantayo ti mangiturong iti puspusotayo kadagiti ammatayo —agkalikagumtayo a mangsapul kadakuada ken mangammo kadakuada ken agserbi kadakuada.”²

Manipud kadagiti Nasantuan a Kasuratan

Malakias 4:5–6; 1 Taga-Corinto 15:29; DkK 124:28–36; 128:15

Manipud iti Pakasaritaantayo

Insuro ni Propeta Joseph Smith, “Ti kaindaklanan a pagrebbengan iti daytoy a lubong nga inted ti Dios kadatayo ket ti panagsukisok kadagiti nagnagan dagiti natay a miembro ti pamiliatayo.”³ Mabalintayo ti agserbi kas mangisaup [proxy] iti templo para kadagiti pimmusayen a kapuonantayo ken mangannong kadagiti kasapulan nga ordinansa para kadakuada.

Ni Sally Randall ti Nauvoo, Illinois, a ti anakna a lalaki nga agtawen iti 14 ket natay, nakasarak iti dakkel a pannakaliwliwa gapu iti kari a maaddaan kadagiti agnanayon a pamilia. Kalpasan a nagpabuniag ti asawana para iti anakda a lalaki, sinuratanna dagiti kabagianna: “Anian a nagloriaan a banag daytoy ta . . . mabalintayo ti

agpabuniag para iti amin a natay a [kapuonantayo] ket maisalakantayo ida agingga a makaalatayo iti ania man a pannakaammo maipapan kadakuada.” Kalpasanna indawatna kadagiti kabagianna a mangipatulodda kenkuana iti impormasion maipanggep kadagiti kapuonanda, a kunkunana, “Panggepko nga aramidno no ania ti maaramidko tapno maisalakan ti [pamiliatayo].”⁴

DAGITI NAGADAWAN

1. Russell M. Nelson, “A New Harvest Time,” *Liahona*, Hulio 1998, 34.
2. Boyd K. Packer, “Your Family History: Getting Started,” *Liahona*, Nob. 2011, 17.
3. *Teachings of Presidents of the Church: Joseph Smith* (2007), 475.
4. Kitaen iti *Daughters in My Kingdom: The History and Work of Relief Society* (2011), 20–21.

Ania ti Maaramidko?

1. Kasano a matulongak dagiti kakabsat a babbai nga ay-aywanak a mangaramid iti family history?
2. Isursuratko kadi ti bukodko a pakasaritaan?

© 2013 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/12. Pannakaanamongna a maipatarus: 6/12. Pannakaipatarus ti *Visiting Teaching Message, June 2013*. Ilokano. 10666 864